



III. ISLOM NAQQOSHLIK SAN'ATI VA "ABADIY" CHIZIQLAR TAHLILI

Ushbu bo'lim islom bezak san'ati namunalarining diniy-falsafiy mohiyati hamda ularning geometrik asoslarini tahlil qilishga bag'ishlanadi.

X–XII asrlar davomida islom madaniyatining shakllanishi bilan birga naqqoshlik san'atida ham yangi estetik yo'nalishlar paydo bo'ldi. Islom aqidasi ko'ra, Yaratganni inson qiyofasida tasvirlash cheklangani sababli, rassom va hunarmandlar o'z g'oyaviy qarashlarini mavhum shakllar, geometrik kompozitsiyalar hamda bezak elementlari orqali ifodalashga o'tganlar. Shu tariqa naqsh san'ati ma'naviy g'oyalarni ifodalovchi muhim badiiy vositaga aylangan.

Geometrik va ramziy naqshlar


Geometrik naqshlarning muhim turlaridan biri **girix** bo'lib, u **"murakkab tugun"** yoki **"chigallashgan bog'lanish"** ma'nosini bildiradi. Handasaviy naqshlar bezak san'atining eng murakkab ko'rinishlaridan sanaladi. Ular turli shakllar — to'rtburchak, uchburchak, aylana, yoylar hamda ko'pburchak elementlarning uyg'unlashuvidan tashkil topadi. Tuzilishiga ko'ra bunday naqshlar to'g'ri chiziqli, egri chiziqli va aralash shaklli turlarga ajratiladi.

Markaziy Osiyo hamda Yaqin Sharq hududlarida girix naqshlari ayniqsa IX–XII asrlarda keng taraqqiy etgan. Arxeologik tadqiqotlar ushbu naqsh turining ildizlari VIII asr boshlariga borib taqalishini ko'rsatadi. Bunga Varaxsha saroyidagi ganch o'ymakorligi namunalaridan tortib, Mug'tog'i va Sug'd qal'asi hududlaridan topilgan bezak elementlari yaqqol misol bo'la oladi. Shuningdek, Zarafshon vodiysi va Xiva hududida IX–XII asrlarga oid topilmalar, XIV–XVII asrlarda esa Samarqand, Buxoro va Xiva shaharlaridagi masjid, maqbara hamda saroylarning bezaklarida girix naqshlarining keng qo'llanilgani kuzatiladi.

Girix naqshlarini yaratish usullari qadimdan ustoz-shogird an'analari orqali avloddan avlodga o'tib kelgan. Bugungi kunda O'zbekiston hududidagi me'moriy obidalarda minglab girix namunalarini uchratish mumkin. Bu naqshlar aniq geometrik qurilish qonuniyatlari asosida yaratiladi. Ularni o'rganish nafaqat shakllarning estetik go'zalligini anglash, balki mutanosiblik va simmetriya kabi matematik tushunchalarning mohiyatini ham chuqurroq idrok etishga yordam beradi.

XIV–XVI asrlar davrida Samarqand saroylari devorlari ulkan va murakkab bezaklar bilan ziynatlangan bo'lib, bu davrda ayniqsa yirik hajmli geometrik naqshlar keng qo'llanilgan. Masjid va madrasalar ichki makonlarida ko'p qirrali, yulduzsimon kompozitsiyalar asosiy bezak unsuriga aylangan. Rang tanlashda esa qizil va ko'k ranglar ustun bo'lib, ular to'q moviy, sarg'ish, och ko'kimtir hamda pushti tuslar bilan uyg'unlashtirilgan.


Masalan, XV asrga oid Samarqanddagi Xoja Ahror Valiy masjidining markaziy shift qismida murakkab girix kompozitsiyasi qo'llangan. Xuddi shuningdek, Xiva shahridagi Toshhovli saroyi ayvonida ham handasaviy girix naqshining nafis namunalarini ko'rish mumkin.




Xoja Ahror Valiy masjidi, markaziy shiftdagi naqsh va uning geometrik yechimi. Samarqand. (XV asr).



Toshhovli saroyi ayvonidagi naqsh. Xiva. 1830-1838 yillar.



Ulug'bek madrasasi. Girixli koshin. Samarqand. (XV asr).



Girixli koshin geometrik yechimi.

Humo qushi va ramziy ma'nolari


Humo qushi qadimdan davlat, boylik va baxt ramzi sifatida talqin qilinadi. Uning ildizlari qadimgi diniy manbalar, xususan “Avesto”dagi **“Far”** tushunchasi bilan bog‘liq bo‘lib, bu tasavvurda u “humo” timsoli sifatida talqin etilgan. Far — omad, baraka va taqdir yaxshiligi belgisi hisoblanadi. Rivoyatlarga ko‘ra, agar u inson boshiga qo‘nsa yoki uning soyasi tushsa, bu kishi baxt, iqbol va saltanatga erishadi, ya’ni hokimiyat sohibiga aylanadi. Shu jihatdan humo va far tushunchalari inson taqdiriga yaxshilik olib keluvchi qudratli ramz sifatida bir-biriga yaqin ma’noga ega.

Me'moriy yodgorliklarda tasvirlar


Buxoro shahridagi Labihovuz majmuasiga kiruvchi **Nodir Devonbegi madrasasi** hamda Samarqanddagi mashhur **Sherdor madrasasining peshtog qismi** me'moriy bezak san'atining yorqin namunalari sifatida e'tiborga loyiqdir. Bu yodgorliklarda ramziy obrazlar va murakkab naqsh kompozitsiyalari o'z ifodasini topgan.

Afsonaviy qushlar va badiiy tafakkur

Semurg', Anqo va **Humo** kabi afsonaviy qushlar xalq og'zaki ijodida alohida o'rin egallaydi. Ularning tasvirlari ertak va rivoyatlarda g'ayrioddiy xususiyatlari, ramziy ma'nosi hamda syujetdagi vazifasiga ko'ra bir-biriga yaqin va o'xshash talqin etiladi. Bu obrazlar qadim ajdodlar tasavvurida shakllangan muqaddas qushlar haqidagi qarashlarning badiiy umumlashmasi hisoblanadi. Ular xalq og'zaki ijodida faqat mifologik obraz sifatida emas, balki ijtimoiy-maishiy g'oyalarni ifodalovchi vosita sifatida ham namoyon bo'ladi. Ayniqsa, inson baxti, adolatli hukmdor va ezgulik haqidagi orzu-umidlar ushbu obrazlarda mujassam etiladi. Shu bois ular xalqning ideal jamiyat haqidagi qarashlarini ifodalovchi badiiy timsollarga aylangan.




**Buxoro shahridagi Labi Hovuz majmuasi,
Nodir Devonbegi madrasasi peshtog'i.**



**Madrasa peshtog'ining grafik
(chiziqli) tasviri.**

Sherdor madrasasi bezak san'ati

Samarqanddagi **Sherdor madrasasi** peshtogini yaratgan me'mor **Abdujabbor** o'z ijodida noyob badiiy yondashuvni qo'llagan. Ushbu bezaklarda hayvonot va o'simlik olami, Quyosh nuri hamda insoniy komillik g'oyalari uyg'un holda tasvirlangan. Bu bezaklar faqat dekorativ element emas, balki ma'naviy mazmunga ega bo'lib, chiziq, shakl va rang vositasida olam go'zalligini ifodalaydi. Ular inson ruhiyatiga ijobiy ta'sir ko'rsatib, estetik va axloqiy tarbiyani shakllantirishga xizmat qiladi. Simmetrik va uyg'un naqshlar orqali yaratilgan bu kompozitsiyalar inson qalbi va tashqi go'zallik o'rtasidagi uyg'unlikni ifodalaydi hamda ma'naviy go'zallik g'oyasini targ'ib qiladi.



Samarqanddagi Sherdor madrasasi peshtog'i.

Madrasa peshtog'ining grafik (chiziqli) tasviri.

Qush va hayvonlarni ramziy ma'nolari

№	Ramz	Ma'nosi
1	Sher	Mardlik, jasorat, kuchlilik, hokimlik,
2	Tulki	Makkorlik, ayyorlik,
3	Chumoli	Donolik, hokisorlik,
4	Bulbul	Sadoqat,
5	Xumo	Baxt qushi,
6	Boyqush	Baxtsizlik, vayronalik.
7	Baliq	hushyorlik, halol luqma.
8	Sichqon	Uy hayvonlarining ko'payishi ramzi.
9	Echki va qo'chqor	Jasurlik, mardlik, pokizalik.
10	Hotam	Saxiylik.
11	Oq kabutar	Tinchlik.
12	Ohu	Go'zallik, himoyasizlik.
13	Tuxum	Birlik.
14	Dev	Makkor, g'azabkor, buzg'unchi maxluq, bo'lib, ezgulikka qarshi kurashuvchi yomonlik, yovuzlik ramzi.
15	Ilon	Yomonlik.
16	Quyov	Ziyraklik.

Ushbu bo'limda islom bezak san'ati namunalarining diniy-falsafiy mohiyati hamda ularning geometrik asoslari tahlil qilindi.

<https://www.youtube.com/playlist?list=PL65hP77udTCrp2qbqxGFrWgpP1uHblved>